



Broj: 04-04-4-1895/25  
Sarajevo, 19. 6. 2025. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA  
„PRAĆENJE REALIZACIJE PREPORUKA IZ IZVJEŠTAJA  
'ZAŠTITA RIJEKA U FEDERACIJI BOSNE I HERCEGOVINE'”**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „Zaštita rijeka u Federaciji Bosne i Hercegovine”, objavljenog 2023. godine. Cilj je bio ispitati preduzete aktivnosti i procijeniti u kojoj mjeri su date preporuke realizovane.

Praćenje je obuhvatilo aktivnosti institucija preduzete u periodu 2023-2025. godine na realizaciji ukupno 18 preporuka. Analizirane su aktivnosti Federalnog ministarstva poljoprivrede, vodoprivrede i šumarstva, Federalnog ministarstva okoliša i turizma, Fonda za zaštitu okoliša FBiH, agencija za vodno područje rijeke Save i Jadranskog mora, Federalne uprave za inspekcijske poslove, kantonalnih ministarstava i inspekcija nadležnih za vode iz Tuzlanskog, Zeničko-dobojskog, Hercegovačko-neretvanskog i Kantona Sarajevo, gradova Tuzla, Zenica i Mostar, te općina Stari Grad i Novi Grad Sarajevo.

Rezultati praćenja pokazuju da je došlo do određenih pomaka u predmetnoj oblasti, međutim preporuke i dalje nisu u potpunosti realizovane. Većina subjekata odgovornih za realizaciju preporuka je preduzela djelimične ili početne aktivnosti, a jedan subjekt je realizovao sve preporuke koje su mu date.

Praćenje je pokazalo da je regulatorni okvir djelimično unaprijeđen na način da su izmijenjene i usvojene uredbe koje regulišu ispuštanje otpadnih voda i upravljanje muljem sa postrojenja za prečišćavanje komunalnih otpadnih voda. Također, blagovremeno su izrađeni i objavljeni radni planovi za pripremu planova upravljanja vodama, utvrđen je broj postojećih i potrebnih postrojenja za prečišćavanje otpadnih voda, te je pristupljeno nadogradnji informacionog sistema voda.

Kantonalna ministarstva i nadležne JLS iz uzorka izdate vodne akte dostavljaju nadležnoj agenciji za vode radi evidentiranja u informacioni sistem voda. Većina općina i gradova je provela aktivnosti na izradi elaborata o zaštiti izvorišta i odluka o njihovoj zaštiti. Preduzete su i aktivnosti na osiguranju efektivnijeg inspekcijskog nadzora, ali je izostalo njihovo planiranje na osnovu precizno utvrđenih kriterija i prioriteta. Uklanjanje divljih i sanacija postojećih deponija, te pročišćavanje procjednih voda sa deponija djelimično se realizuje.

Još uvijek nisu preduzete sve aktivnosti kako bi se osiguralo da katastri komunalnih uređaja sadrže podatke o stvarnom stanju komunalnih instalacija, niti su izrađeni svi planovi prioriteta za dostizanje dobrog stanja rijeka II kategorije. Također, prijedlog novog zakona o vodama, koji je preduslov za sistemsko unapređenje predmetne oblasti još nije izrađen.

Uvažavajući činjenicu da su rijeke jedan od najznačajnijih prirodnih resursa Federacije, Ured za reviziju cijeni da je neophodno preduzeti dodatne aktivnosti kako bi se date preporuke u potpunosti provele. Čiste i zaštićene rijeke ne samo da su snažan pokretač održivog ekonomskog razvoja, nego su ključne u osiguranju javnog zdravlja.

Izvještaj revizije učinka dostupan je na internet-stranici Ureda za reviziju: [www.vrifbih.ba](http://www.vrifbih.ba).

